



KOMUNIKADO PA PRENSA

Fecha

13 di mei 2015

Account Manager

Jhanirha Da Costa Gomez-Anita

Email

jhanirha.anita@gobiernu.cw

MANERA ANUNSIÁ ANTERIORMENTE;

TA SERA J. H. J. HAMELBERGWEG DIA 18 DI MEI

Willemstad – Ministerio di Tráfiko, Transporte i Planifikashon Urbano huntu ku USONA ta informá komunidad ku entrante djaluna 18 di mei benidero lo sera gran parti di Hamelbergweg pa tantu peaton, baiskel i vehíkulonon motorisa. Esaki ta den kuadro di konstrukshon di Hospital Nobo.

E medidanan ku lo keda introdusí pa por sera Hamelbergweg manera, desviashon di tráfiko i rutanen di emergensia, a keda palabrá ku tur e partidonan konserní. Naturalmente e hospital i bisindario lo keda aksesibel pa kasonan di emergensia durante henter e periodo ku e kaya aki ta será.

E partidonan ku a keda envolví den e palabrashonnan tokante Hamelbergweg ta, Kuerpo Polisial Kòrsou, Brantwer i Servisio di Ambulans. Tambe a aserka partidonan manera ABC Busbedrijf, STU, OUW, UVV i CEC pa partisipá den e palabrashonnan. Esaki ta pa garantisá sirkulashon i seguridat di tráfiko adekuá den bisindario di e hospital. E eksperto den planifikashon, e kontratista i e arkitekto lokal di Hospital Nobo Otrobanda tambe a keda envolví den e palabrashonnan.

Den e simannan ku a pasa, Brantwer i otro partidonan a kore e ruta diferente biaha pa tèst si e rutanen planiá ta realístiko. E rutanen a keda evaluá ku gran atenshon dor di e partidonan konserní. E kambio den e situashon di tráfiko lo keda anunsiá den diferente medio di komunikashon den e dianan binidero.

Hamelbergweg lo ta aksesibel atrobe ora e hospital nobo habri su portanan. E kaya lo tin e mesun punto di entrada i salida na Roodeweg i Pater Eeuwensweg, pero e lo kore rondó di e hospital nobo.

Ta pone diferente bòrchi di indikashon ku lo indiká ku Hamelbergweg ta sera i tambe kua ta e rutanen alternativo. Ta pidi tur usuario di e kaminda aki pa tene hopi bon kuenta ku e kambionan aki pa evitá aksidente!

Ta nesesario pa sera Hamelbergweg temporalmente pa asina por sigui ku konstrukshon di e hospital nobo. Na e momentu aki ya kaba ta trahando riba e tereno pegá ku Hamelbergweg patras di Colon. E hospital nobo lo keda parsialmente konstruí riba e tereno aktual di SEHOS. Pa e motibu aki, e konstrukshon lo krusa Hamelbergweg.